

Yubile y'imyaka 50 : 1962-2012.

Gakwaya Jérôme : Nyakubahwa padiri **HABINEZA Yohani-Batisita**, kubera Yubile mutegura uyu mwaka, abakristu badusabye kugira icyo dutangaza mu kanyamakuru ka diyosezi yacu « Umusemburo w'ubusabane. » Ni yo mpamvu tubasaba kubidufashamo mutubwira muri make ubuzima bwanyu nk'Umusaserdoti.

1. G J : Padiri **HABINEZA Yohani-Batisita** ni nde ? (identification)

P JB : Muri 1961, maze umwaka umwe mu Rwanda, uwanyise iryo zina, dutarama, ni musenyeri Ludoviko GASORE wari Igisonga cya Mgr BIGIRUMWAMI Aloyizi, Umwepiskopi wa Diyosezi ya Nyundo; nsanga ari ryiza, ririmo gahunda nziza, ndarishima n'umwepiskopi BIGIRUMWAMI ararishima, ati: izina ni ryo muntu. Ubundi nitwa MENDIONDO Yohani-Batisita. Data yitwaga MENDIONDO Batisita na mama Pasikalina. Navukiye mu Bufransa y'I Burengerazuba-hepfo (Pays Basque). Ababyeyi banjye bari abahinzi b'abakene cyane; inzu twari dutuyemo n'isambu, byose byari ibya databuja, igice cya gatatu cy'ibyo twejeje n'icya kabiri cy'amatungo maremare byari ibya databuja. Ni databuja wari ushinze gusana inzu, aliko ntabwo yayisanaga rwose, iyo nzu yaravaga cyane bigatuma dutega amasafuriya iyo imvura iguye. Twari abana bane: abahungu babiri n'abakobwa babiri. Umwana w'imfura ni mushiki wanjye na n'ubu uriho ageze ku myaka 88. Naho mukuru wanjye yitabye Imana kimwe n'undi mushiki wanjye wari umubikira, yitaba Imana afite imyaka 56.

2. G J : Igitekerezo cyo kuba umusaserdoti mu Rwanda cyaje gite ?

PJB : Ibyo kubivuga muri make biragoye ; gushaka kuba padiri byaje buhoro buhoro nkiri muto ndi umuhereza wa Misa, hanyuma maze kuba ingaragu nsa n'ubyanze, ariko ngeze ku myaka 15 numva rwose Yezu ampamagararira kuba umusaserdoti. Ndagije imyaka ibiri mu iseminari nkuru y'iwacu kavukire (diocèse de Bayonne), njya gukorera igihugu umurimo wa gisirikari, banyohereza mu gihugu cya Algérie mu rugamba rw'igihe abanyalijeri baharaniraga ubwigenge, abafransa nabo babirwanya. Ni ho nahuye n'abasirikare benshi b'abanyafurika, ni bo banteye gutekereza gukomeza seminari muri Afurika hamwe n'abaseminari b'abanyafurika. icyo gihe nashatse no kujya mu gihugu ubu cyitwa Burkinafaso, ariko ntibyashoboka. Byatumye ndangije kuba umusirikare nsubira mu iseminari y'iwacu. Aho ni ho, umunsi umwe haje padiri Jorji LOVENS wo muri diyosezi iyi ya Nyundo, akaduha amakuru y'ino, avuga n'abaseminari b'ababirigi n'ab'abafransa biga mu Nyakibanda hamwe n'abanyarwanda kandi ari abaftratri ba Mgr BIGIRUMWAMI. Nanjye rero ni ko kuza mu Rwanda, abepiskopi ba Bayonne na Nyundo bombi bamaze kubisuzuma no kubyemera. Nageze ku Nyundo mu mwaka w'1960, mu kwezi kwa 8. Mu mwaka w'1962, kuri PENTEKOSTI, ku wa 10 kamena ni bwo Mgr Aloyizi BIGIRUMWAMI yaduhereye Ubusaserdoti ku Nyundo turi batanu abanyarwanda 2, abafransa 2, n'umubirigi 1.

Umuhuza w'Imana n'abantu. Ubusaserdoti bwanjye (ministeriel ni ukuvuga ubwo duhereza, de service), ubw'abapadri bose ni ubwa yezu ; ni we wadutoye, ku bwa Kiliziya, ngo tube mu bantu mu cyimbo cye , tube we wigisha, tube we ubatiza, tube we ugirira imbabazi abafite ibyaha, cyane cyane tube we mu guhimbaza UKARISTIYA, ati : namwe mubikore munyibuka. Ibyo byose narabikoze mu myaka 50. Batumira abantu mu birori bya yubile, nasabye ababishinzwe kwandika iri jambo ryo mw ibaruwa Paulo Mut yandikiye Abanyefezi : *Nihasingizwe Imana, Se w'Umwami wacu Yezu Kristu*. YUBILE ni ugushimira, Yubile kandi ni ugusaba imbabazi, nzisaba Imana, nzisaba abantu, ngahabwa Penitensiya, Isakramentu duherwamo imbabazi ubwanjye nahaye abantu benshi ariko nanjye ndi umunyabyaha. YUBILE ni ivugururwa rikomeye muri Kristu wapfuye akazuka ari twe agirira.

7. G J : Mwabwira iki abasaserdoti babyiruka ubu (ngo bazagere ikirenge mu cyanyu)

P JB : Nababwira nti "Nimwange mukomere, ikirenge mu cya YEZU; urugero ni YEZU, yee natwe ariko kuri twebwe ni ngombwa gushishoza kuko haba ubwo dushobora gutanga urugero rubi buhoro cyangwa cyane ; ntibikabe !

8. G J : Naho se abakristu ba paruwasi MUKUNGU mwababwira iki ?

P JB : Nabo nababwira nti: nimukomere, mubane na YEZU muri Kiliziya, mu rugo, mu muryango-remezo, mu nama, muri santrale, muri diyosezi, mukundane, mwirinde irari n'ifaranga, ritabatwara mwarigize ikigirwamana, mukunde Misa, mwirinde kunyurwa n'ubusa, muharanire Yezu utuzaniye imbabazi z'ibyaha, ubugingo bw'iteka, izuka n'ubuzima.

Nawe, Jérôme, mu gusoza iki kiganiro, nkubwire nti: KOMERA hamwe na Madame n'abana.!